

## **Incumbensa Claus concernent l'adattaziun dal sistem electoral per il cussegl grond**

En regard a las elecziuns dal cussegl grond dals 10 da zercladur 2018 ha la regenza dal chantun Grischun fixà il dumber da las deputadas e dals deputads da mintga circul electoral che pon vegnir elegids per la perioda da legislatura 2018-2022. Cunter il conclud da la regenza han 54 personas privatas sco er tschintg partidas politicas ch'èn activas en il chantun Grischun fatg recurs tar la dretgira administrativa dal chantun Grischun sco er tar il tribunal federal.

Cun la sentenza dals 29 da fanadur 2019 è quest recurs vegnì approvà per part dal tribunal federal. Il tribunal federal constatescha che la procedura electorala da maiorz che vala actualmain per l'elecziun dal cussegl grond correspunda per gronda part, dentant betg en tut ils regards, a las pretensiuns dal dretg constituziunal. Inconfurma cun la constituziun federala è l'applicaziun dal sistem electoral da maiorz en il circul electoral il pli pitschen Avras ed en ils sis circuls electorals cun la pli gronda populaziun Cuira, Tschintg Vitgs, Engiadin'ota, Razén, Tavau e Glion.

Cleramain constatescha la sentenza che la procedura electorala da maiorz n'è betg da contestar per 32 circuls electorals. Per ina gronda part da la populaziun stat en quests circuls la persunalitad da las candidatas e dals candidats en il center e betg l'appartegnentscha ad ina partida. Uschia datti differentas pussaivladads per il Grischun per adattar ses sistem electoral. D'ina vart po vegnir mantegnida la procedura electorala da maiorz, sch'il circul d'Avras sco circul electoral il pli pitschen vegn engrondì e sch'ils circuls electorals memia gronds vegnan correspudentamain dividids en circuls electorals pli pitschens. Ina segunda pussaivladad è quella da far las elecziuns tenor il sistem electoral da proporz en quests circuls electorals. En ils 32 circuls electorals incontestads duai en quest connex vegnir elegì vinavant tenor la procedura electorala da maiorz.

La represchentananza da nossas linguas, da nossas vals, da nossas regiuns e da nossas culturas en il parlament è indispensabla per il Grischun. Ina introducziun dal sistem electoral da proporz pur sto pervia da quai vegnir refusada.

**La regenza vegn incumbensada da suttametter al cussegl grond ina missiva davart l'adattaziun dal sistem electoral per il cussegl grond. En quest connex duai la procedura electorala vertenta vegnir mantegnida vinavant en ils 32 circuls incontestads. Per ils circuls electorals contestads dal tribunal federal duain vegnir proponidas duas variantas:**

- 1. Mantegnair la procedura electorala da maiorz cun engrondir il circul electoral Avras e cun divider ils 6 circuls electorals cun la pli gronda populaziun en plirs circuls electorals pli pitschens.**
- 2. Introducir il sistem electoral da proporz en ils 6 circuls electorals cun la pli gronda populaziun. Complementarmain po vegnir examinada ina divisiun da singuls da quests circuls electorals en circuls electorals pli pitschens cun procedura electorala da maiorz. Il circul electoral Avras sto er vegnir adattà.**

Cuira, ils 29 d'avust 2019

**Claus**, Michael (Donat), Cavegn, Berther, Bettinaglio, Bigliel, Brunold, Buchli-Mannhart, Caluori, Cantieni, Caviezel (Tavau Clavadel), Censi, Clalüna, Danuser, Derungs, Ellemunter, Engler (Tavau Vitg), Epp, Fasani, Felix, Flütsch, Föhn, Giacomelli, Grass, Gugelmann, Hardegger, Hartmann-Conrad, Hefti, Hitz-Rusch, Hohl, Holzinger-Loretz, Jenny, Jochum, Kasper, Kohler, Kunfermann, Kunz (Fläsch), Kunz (Cuira), Kuoni, Loepfe, Loi, Maissen, Märchy-Caduff, Marti, Michael (Castasegna), Mittner, Müller (Susch), Natter, Niggli (Samedan), Niggli-Mathis (Grüsch), Papa, Paterlini, Pfäffli, Ruckstuhl, Rüegg, Sax, Schmid, Schneider, Schutz, Stiffler, Tanner, Thomann-Frank, Thür-Suter, Tomaschett (Breil), Ulber, Valär, Waidacher, Weidmann, Wellig, Widmer-Spreiter (Cuira), Zanetti (Sent), Costa, Davaz, Engler (Surava), Niederreiter